



REPÚBLIKA DEMOKRÁTICA TIMÓR-LESTE

GABINETE PRIMEIRU-MINISTRU

ALOKUSAUN

SUA EXELÊNSIA PRIMEIRU-MINISTRU

KAY RALA XANANA GUSMÃO NIAN

IHA OKAZIAUN SERIMÓNIA TRANSFERÊNSIA RESPONSABILIDADE

EZEKUTIVA HUSI UNPOL BA PNTL IHA DISTRITU LAUTÉM

Lospalos, 14 Maiu 2009

Exmu. Senhór Sekretáriu Estadu Seguransa, Dr. Francisco Guterres,

Exmu. Senhór Xefe Estadu-Maiór Jenerál F-FDTL, Brigadeiru-Jenerál Taur Matan Ruak,

Exmu. Senhór Komandante-Jerál PNTL, Komisáriu Longuinhos Monteiro,

Exmu. Senhór Representante Sekretáriu-Jerál ONU, Dr. Atul Khare,

Exmu. Senhór Komandante Polísia Nasoens Unidas, Superintendente Xefe Luís Carrilho,

Exmus. Senhores Representantes Korpu Diplomátiku,

Distintus konvidadus

Ofisiais, Sarjentus no Ajentes PNTL,

Ohin loron istóriku ida ba Polísia Nasionál Timór-Leste. Neineik ita hahú halo transferênsia ka entrega responsabilidade ezekutiva kona-ba seguransa interna paíz ne'e nian husi Polísia Nasoens Unidas ka UNPOL ba Polísia Nasionál Timór-Leste ka PNTL.

Hahú ohin PNTL sei sai responsável ba operasoens polísia nian iha Distritu Lautém tomak, tanba ne'e mak efetivu iha eskuadras hirak ne'ebé fahe iha rejaun administrativa ne'e tomak, sei hatán direktamente ba Komandante Distritál PNTL.

N'e la'ós hadau fali direitu ida, maibé atu simu fali knaar todan ida ba ita timór-oan tomak, liu-liu hanesan obrigasaun boot ida ba sira ne'ebé iha responsabilidade direta atu garante seguransa ba populasoes no sira nia riku-soin hotu.

Ha'u hanoin hikas fali katak ne'e la'ós ba primeira vez mak PNTL simu fali knaar husi UNPOL. Iha tinan 2004, tinan rua depois-de Timór-Leste hetan independênsia ho rekonhesimentu husi comunidade internasionál, PNTL simu tomak nia funsoens, hodi sai hanesan forsa polísia mesak ida ne'ebé responsável ba seguransa interna Paíz nian.

Oras ne'e ita la presiza ona halo análise detalhada kona-ba buat ne'ebé akontese, hodi loke fali kanek, tanba ne'e la'ós fatin no tempu atu halo buat hanesan ne'e. Buat ne'ebé ita hotu hatene, mak prosesu ne'e la hala'o didi'ak, hahú husi preparasaun ladún di'ak ne'ebé

PNTL hatudu rasik ona, to'o ba oinsá PNTL bele kumpri loloos misaun ne'ebé entrega ba nia.

Formasaun ida ke fraku liu no lufu-lafu de'it, ho modelu polisia nian ida ne'ebé la tuir realidade timór-nian rasik, ne'e hanesan razaun prinsipál ida hotu ne'ebé halo sira la hetan susesu, hanesan PNTL hatudu rasik ona, haré ba insidentes ne'ebé mosu iha finais Abril 2006.

Ita kostume rona ema dehan katak Istória hanesan siklu ne'ebé repete beibeik. Karik iha situasoens barak liafaun ne'e bele loos duni. Maibé iha kazu konkretu ida ne'e, ha'u fiar katak ita sei bele fila tiha teoria ne'e, tanba ita sei la husik ita nia Polisia halo tan sala!

Ita hotu empenhadus ka prontu atu hala'o fali reorganizaun no restruturaun ba PNTL, hanesan prosesu ida ne'ebé presiza duni atu aumenta kapasidade operasionál no níveis disiplina, hodi nune'e bele garante Estado de-Direitu ne'ebé estabelese ona tuir lei.

Ha'u hateten ona iha 9º Aniversáriu PNTL nian liubá, ne'ebé celebra iha dia 27 Marsu, i ha'u hanoin fali agora, katak Polisia Timór-nian presiza hatudu ona nia-an hanesan polisia moderna ida, ne'ebé comunidade tomak respeita, polisia ida ke respeita direitos no garantias sidadauns tomak nian no hatuur metin ba iha : kadeia komandu, ierarkia no disiplina.

Tanba ne'e maka foin daudaun ami aprova ona Lei Orgânica ida, ne'ebé prinsipius tolu ne'e konsagra. Kadeia komandu presupoen ka signifika katak iha kada eskalaun komandu, kompete ba idaidak nia komandante rasik, responsabilidade primária atu hola desizoens ne'ebé efetivu tomak iha nia okos tenke halo tuir.

Ierarkia, katak iha obrigasaun ba ofisiais hotu-hotu, sarjentus no ajentes PNTL nian atu reporta diretamente ba sira nia Komandante rasik, i tenke ba nia de'it, no sira labele hakat liu ierarkia ne'e se la iha autorizasaun.

Disiplina, signifika katak tenke kumpri ka obedese tomak ordens no regulamentus mai husi kadeia komandu ne'ebé elementus PNTL tomak enkuadra ka halo parte bá, ho konsekuênsia sei bele aplika ba sira medidas disciplinares todan, i ba kazu ne'ebé todan liu, bele hasai kedas sira husi Polisia no fila fali ba vida sivil.

Ofisiais, Sarjentus no Ajentes Komandu Distritál PNTL nian tomak iha Lautém,

Imi hotu lori responsabilidade ka naha ida ke todan iha imi nia kabás: Katak imi maka iha oin atu hala'o funsoens ne'ebé baibain entrega ba korpu polísia, tanba ne'e mak ema hotu tau matan iha imi nia knaar.

Karik PNLT Komandu Distritál Lautém la konsege kumpri nia misaun ne'ebé hahú ohin atu komesa hala'o, ne'e signifika katak instituisaun ida ne'ebé ita hakarak sai efikáz ho eficiente sei hetan susar ka sai prejudikadu. Ita Timór-oan tomak sei moe tanba imi nia hahalok.

Tanba ne'e mak ha'u hakarak hato'o apelu ka mensajen ida ba imi hotu, katak imi tenke kumpri ho onra i briu ka korajen imi nia knaar. Ho laran moos, matenek no badinas, imi tenke prontu defende kauza polísia nian tomak.

Imi rasik mak agora tenke hala'o tarefas ka knaar tomak ne'ebé sei iha, hahú husi hola medidas preventivas atu satan ka labele husik ema halo krimes no buat aat seluktán, to'o oinsá bele hatán lailais no didi'ak hasoru kualkér violasaun ba Lei.

Ha'u hakarak mós fó hanoin fali ba imi hotu katak imi la mesak.UNPOL sei kontinua fó tulun, maibé agora iha de'it nível asesoria.La'ós UNPOL maka atu hala'o nafatin imi nia servisu, maibé sei akonselha imi kona-ba oinsá imi tenke hala'o imi nia knaar.

La'iha ema ida mak moris mai matenek kedas ona; iha ita nia profisaun, maski ita hetan preparasaun ne'ebé di'ak liuhotu, ita presiza nafatin simu konselhu husi sira ne'ebé iha liu experiênsia kompara ho ita.

Tanba ne'e maka simu bá tulun hotu ne'ebé kolegas internacionais sira hakarak fó. Imi lalika foti ka loko-an hodi hakarak hatudu katak ima mesak mak loos no matenek. Loos duni, katak ikus mai imi mak tenke ko'alia, desizaun mak ida ne'ebé imi nia Komandante rasik mak foti. Maibé tenke desizaun ida ke bazeia ba boun sensu ka ba razaun no verdade i tanba experiênsias i konhesimentus ne'ebé fahe ba malu.

Ba imi hotu, la iha exepsaun, ha'u harohan atu imi bele hetan rahun kmanek no êzitus ka susesus profesionais iha imi nia moris foun ida ne'e, hodi servi ba Polísia no ba Pátria.

Obrigadu barak.